

平
播
全
書

平播全書卷十一

明長垣李化章

牌票

修綦江衙門候親征駐劄

爲軍務事照得大兵四合滅賊甚易但恐諸將不肯齊心
夾攻未免曠日持久老師費財今本部院擬不日親臨營
中督陣刻期進剿所有駐劄衙門令行修理爲此牌仰巡
上東道官吏卽行綦江縣掌印官將本部院駐劄衙門作
速量加修理齊備牆垣須要高厚週圍蓋以荆茨至於入
播一帶路道亦要上緊修砌平坦以便經行合用錢糧一

而動支興工一面具由詳報毋得違誤未便

黔路乏糧行餉道

爲軍務事照得南丹獨山平州豐甯等官兵奉調前來征剿賊節據塘報頗有戰功各兵近自三月十三日起因無裹糧延至二十七日豐甯官兵盡皆歸去平州三去其一南丹去其半爲照師行糧從自古記之乃該路監司承委官員獨不思人情一日不再食則飢而使之枵腹對壘以致各兵半月無糧相率而去萬一各兵盡散逆賊乘虛突出其債事豈淺淺耶在各委官固不足惜而該道責任頗重不知何以解也殊可駭異擬合行查爲此牌仰該道

官吏卽查該路官兵旣無糧餉承委官員因何不行轉輸該道因何不行催督各兵旣多星散緣何不行阻留任其自去逆賊未滅該路倚何夾攻作何收拾一面逐一查明據實回報一面速將在營官兵多方撫恤給與糧餉如或仍前視爲末務不肯經心督催接濟以致復有脫巾之虞者責有攸歸未便

獎賞水西鎮雄官兵

爲旌獎衝鋒官兵以鼓忠勇事據貴州左監軍道報據烏江沙溪二哨把事王嘉猷陳恩報稱目兵直抵賊巢大水田屯剽連日攻圍長箐等囤至二十九日逆賊楊應龍父

子因見本府斬其來使首其餽儀親領大兵前來迎敵該
水西鎮雄合兵大戰敗走死者不可勝數又據塘報酋具
下程銀兩田氏以臺蓋段匹騾頭差人送澄不受呈解貴
州撫院查驗各等因到部看得宣慰安疆臣土官隴澄深
入巢穴屢立戰功雖無首級之來獻實多矢石之交加至
於斬使激戰足見超距之勇而饋儀不受尤徵清節之風
此土司中所難者相應嘉獎以示旌異爲此牌仰監軍道
官吏即便會同畢節道於懸賞銀內動支一千兩內將一
百二十兩分爲三分每分四十兩折花段銀牌送給宣慰
安疆臣土官隴澄并伊母鳳氏其餘八百八十兩分給目

把陳恩王嘉猷等及水西鎮雄散兵作牛酒各收領以示
本部院并撫院旌異忠勇衝鋒官兵之意仍行令益奮忠
勇以殲元兇大膺懋賞其支給過緣由報查

催彭元錦進兵

爲軍務事據永順宣慰彭元錦報稱卑職始以糧運愆期
師行已遲沿途又苦夫馬缺乏匍匐不前比至進營兵皆
食盡復令各兵轉往偏橋運米曠日持久疲於奔命以致
閑住龍溪寸功未建懇乞頒賜憲檄限以斬關渡江等因
到部院看得本官夙負忠勇深諳機宜卽其疊疊之條陳
可知赳赳之敵愾乃因糧餉不繼遂致連連言及至此殊

可痛恨近該本部嚴文督催茲已就緒合行督勵進取以收厥功爲此牌仰本官限文到卽便統率部下兵馬聽總兵陳璘分布調遣上緊斬關渡江直抵白田壩會合諸哨齊心併力攻取海龍岡共擒逆賊上報朝廷下盡職分早奏奇功懋膺爵賞川省諸路俱已合營立等共舉慎勿愆延失其時也慎之慎之

行道鎮禁納降縱賊

爲軍務事照得兵已入關賊亡只在旦夕若各路齊力夾攻逆賊行且坐盡乃賊見事急姑以文來乞降明欲一緩我師而圖之一愚其下而用之此時卽當斬使焚書示以

必勦則眾苗膽寒瓦解獨夫何地可容乃各營文武官不能決斷有加以犒賞而約期者有屢納其使而留營者使賊得欺其下人謂行且見撫死守以待似此舉動明係縱賊可爲深恨爲此牌仰該道官吏卽宜申嚴軍令戒約兵將合力夾攻期於滅賊其有投降者除賊之黨與及播之苗民原宜潰黨照格施行外若逆賊自己遣使具文及稱出妻見子等語并不得憑信若使人到營或斬或解不得放回致透漏消息令賊得以欺人負固且懈我軍心又觀其初二日使人於綦江營初三日兵來初七日使人於合江營初八日兵來明係愚我以後但有賊使來更宜倍加

謹嚴以防接戰若仍前往來不絕是假不拒來使之名爲
納賄通播之地三尺具在

催各路齊心搏巢

爲軍務事照得川省大兵旣已深入賊巢連營拒賊必須
同心協力彼此應援方克有濟誠恐各將自分爾我坐視
觀望有誤軍機異日卽按法定罪何裨於事合行申明爲
此牌仰該鎮自今以後各營旣已合哨必須彼此應援如
我去攻賊則或掎其前或角其後或擊其左或擊其右各
照信地齊進不可參差如賊來攻我則正哨對敵鄰哨接
應近者要其歸遠者掎其固務使聲勢相倚不可坐視以

後有功則大家論功有罪則大家論罪若本營雖稍有失而應援得力使別營成功者本營仍以功論若本營雖無失而應援不力使別營有失者本營仍以罪論法在必行必無假借自示之後若仍心懷嫉忌情分爾我已無功則惟恐人之有功已有罪則惟求人之同罪如此存心犬豕不如公論昭彰從重究罪決不輕縱

行巡下東道改道運餉

爲軍務事照得南川一路官兵已經屯劄高坪應運糧餉自南川由官壩入婁山道路近便餉道無阻業已牌行該道查議改運去後續據營中各官鄉導人役各稱南川過

眞州入桑木關抵高坪路幾千里高坪過婁山僅五十里
婁山至南川僅三百里省路大半甚屬相應各報與本部
採訪相同所據未發之餉亟應改運爲此牌仰該道官吏
即便督行管餉管運等官將南川糧餉除已發者行令護
餉官運送至營交割其未發糧餉改由官壩婁山入高坪
至營一面先差人由婁山查看先達該營知會一面將防
護官兵及押運委官原在眞州望草等處者必俟盡回方
撤護兵轉向婁山毋得倉皇遺漏致前去運夫或有疏虞
亦勿得稽遲後運致不接濟其眞州一帶地方行令鄭駱
二士官嚴加防護用保無虞俱毋違錯未便

行陳李二總鎮合營進攻

爲賊勢猖獗懇乞添兵合哨等事據湖廣右監軍道呈播賊十餘萬空巢而出來拒楚師俱屯聚三渡關上其關外七牌青蛇長坎瑪瑙土門等處煙火二十里不絕賊徒亦不下七八萬楚兵一路僅三萬眾寡之勢大相懸絕不便徑趨此路原擬黔楚合剿請催李總兵統兵與陳總兵合哨共堵七牌各囤等因到部院爲照川省四路官兵逼海龍囤下若龍爪養馬各囤俱已打破劄兵左右晝夜環攻立等黔楚官兵共擒逆賊乃二省主將誤聽三寨鼠賊虛聲尙在關外趑趄不進切查關內之賊不滿五萬屢被官

兵入關殺戮將盡關外豈有十萬之理殊爲無據但諸國不下有礙長驅必二將合剿方爲勝算合就督催爲此牌仰該鎮卽便帶領部下兵馬刻日渡江與陳總兵合營相機密謀戰守攻克各固直入播州會同川中各路將兵共擒逆賊早奏膚功毋得自分彼此有違軍紀致貽後悔不便

詰責劉總兵協力殺賊

爲軍務事照得總兵官劉綎屢經指摘朝野側目本部院排羣議而留之致令該科叅駁謂與朝廷背馳而爭本部院之知遇本官可謂古今無二矣本官上感朝廷使過之

仁下念本部院非常之遇謂宜大奮勇武首殲元兇爲自
己解不韙之名爲地方造無窮之福本部院方有詞於朝
廷有顏於川省乃本官自入播以來略無建豎四月初一
之戰令偏裨孤軍遠劄爲賊所襲一營皆沒本部院尙以
偶有遺慮未卽詰責乃數日以來按兵不舉坐觀成敗且
受賊使連日不絕未卜何意初四日以後賊日日與永合
兵戰旣未見該營應援十二日賊單衝南川營亦未見本
官合哨豈以已有敗著幸人之同之耶抑以本自畏賊一
蹶而不復振耶卽今天熱雨多久在賊巢萬一奸細得行
別營受累卽本部院引罪所不待言本官六扛之聲著在

耶報尙能保其身家否耶本部院與本官不但共事亦且同禍何惜盡言以貽後悔爲此牌仰本官文到卽便誓心報國奮勇殺賊身爲盟主與二路剋期齊進務須一鼓成功以謝人言以膺爵賞卽本部院亦與有榮施焉如再遷延觀望或別有機關令逆賊苟延同事受禍本部院先以軍法從事而後上聞決不甘心爲所愚弄也須至牌者

行陳李二總兵防賊逃入九股

爲飛報軍情事據南川監紀推官高折枝報稱四月十一日捉獲石砬司馬千駟幼僕張文道供稱千駟同播賊在固聞大兵去固不遠文道遂於初十日逃出稱應龍計窮

欲統兵徑殺出白泥地方逃入湖廣金峒九股苗聚兵等情據此看得川中各路官兵已圍海龍囤乃逆賊計無所之欲奔九股聚兵之說較與本部院屢行隄防之約大略相符雖我官兵星羅碁布諒不致漏網然隄防之策豈容少解爲此牌仰該鎮督率部下官兵一面克圍入關共圖殄賊一面申飭各該關堡把守官兵晝宵加謹隄防仍申諭投降九股等夷苗如遇逆賊逃遁務要登時縛獻以憑照例授官加賞不許容隱如或疏虞致賊漏網責有所歸行各路會合舉事

爲軍務事照得官兵入關逆賊上固碁江路劄關子山永

合路劄水牛塘南川路劄蒙子橋道理相距不過十四五里勢成犄角卽湖貴稍後亦足以角力矣但困獸思鬪死灰復燃必拌死一戰而後甘心入國此勢之所必至者萬一將領各自爲心秦越相視兵士不肯齊力彼此參差卽非勝算所賴三路會合並舉方得萬全合再申嚴督勵爲此牌仰該道官吏卽行該鎮督率漢土官兵時時會合同心舉事圍圍擣巢共擒大憝早奏捷音以慰本部院拭目仁望至意如或各懷猜忌參差誤事或彼出兵而此不應或此被攻而彼不援或遠放銃砲以了事或故張賊勢而後期有一於斯定以軍法從事須至牌者

發陞官空劄

爲軍務事照得大兵已入賊巢擒斬逆賊應在目下但凡人之情無感不興烈士之心有激愈奮節經發過懸賞銀兩雖多恐功名之士不重財利必須懸示官爵方可責其用命爲此牌仰監軍道官吏卽將發去空劄二十張轉發永合綦南二路監紀官各十張責令在營會同總兵官如遇大敵當前願衝擊以挫狂鋒又如問道可乘願出奇以破賊國諸凡至險至難之事可期一舉成功者卽與本人定約先照功蹟大小於空劄內填定姓名職銜責之用命如遇成功當卽給授仍候事完之日題請實授應加陞者

照格加陞毋得過於吝惜致誤事機亦勿得徇情濫給致壞名器每給過一張卽將姓名功蹟緣由開報用不盡者事完類繳

計發去空劄 指揮三張 千戶三張 百戶四張 守東道二十張

行道鎮協力進剿

爲軍務事照得川兵四路入關已經半月之上未見報有攻取消息誠恐老師費財坐失機會漸入溽暑取事更難且賊頗知兵萬一停囚長智別有作用或夜襲或詐降或劫糧或反間一爲所中大事去矣彼時卽將各將盡置於

法亦何濟於事合行申論爲此牌仰該鎮官吏卽今自渝抵播方數百里本部院亦難遙定期會聽憑各總兵與各監紀官就近約期進攻或掎前角後或設伏張疑或以正合而以奇勝之或以少嘗而以眾覆之務要信誓必明期會不爽合數萬人之心爲一人之心合數萬人之力爲一人之力必期雪恥除兇一勞永逸懋功懋賞自有令甲若遷延不決觀望不前已有失而幸人之敗已有功而忌人之同以仗鉞登壇之任爲行險徼幸之圖致誤大事明有國法陰有神譴上方之劒且將試矣

催合江餉米行巡下南道

爲緊急軍務事據巡下南道揭報水陸運過米數到部院查得該道督發自三月三十日起四月十五日止共運過餉米一千七百七十九石五斗吳總兵統領入營官兵計三萬以上日支米一升共該三百石半月該四千五百餘石今該道止發一千七百七十石不敷六日之食尙有九日何以爲炊如此發運眾兵安得不餒險國何由而破四路兵馬糧餉三路皆有盈餘唯合江一路時時告匱再四行催未見力行合再嚴催爲此牌仰該道官吏卽便督行各該委官催僱人夫船隻水陸多方起運每日發行糧米務足三萬官兵一日之食稍有不足必致枵腹况兵臨賊

國日夜接戰如此不得宿飽何以責其用命倘各委官仍前怠忽誤事聽該道指名揭報以憑重處施行毋得再違未便

行守東道監軍

爲軍務事照得川兵四路已逼圍下釜底之魚滅在旦夕矣但哨雖合尙有被前此不前期雖約亦多甲進乙不進似此參差之形明有爾我之勢卽今若不及時斷定萬一日延一日溽暑多雨取事更難而老師費財事久生變坐失機會真莫知所終者查得按察司管分守川東道事張按察使久歷邊疆素諳戎務且播地實其事責相應行委

綜理爲此牌仰該道卽便不妨原務兼程馳赴營中會同
監軍張參政謝參政劉總兵吳總兵馬總兵曹副將等及
各監紀等官共集公所務要上下協謀文武同心仍憑神
明歃血盟誓畫定方略糾合三軍刻定日期一齊並舉互
相夾攻遠近接應直擣巢穴擒斬渠魁計出萬全功收一
舉上報朝廷下盡職分早奏奇功共懋爵賞如或仍前參
差不進逗遛不前或坐觀成敗致誤軍機誤國殃民者卽
據實揭報前來本部院先以尙方行事然後奏聞的不爽
信且各官旣違盟誓必殃及子孫神靈不祐豈云草草該
道須要大展謀猷任怨任勞矢心報國忠憤忘家慎勿疑

忌遠嫌有孤委託未便

行守東道督餉

爲軍務事照得大兵四合環攻賊巢日需糧餉最爲喫緊
今照在外則有敘瀘道總理轉運已有次序而營中尙乏
一道綜理其事以致分委官員無所稟受羸絀不均殊欠
調停合行專督共濟時艱爲此牌仰該道官吏即便親詣
營中專一總理四路糧餉仍會同川東張參政徐僉事川
南史副使劉參議如某營轉運不前上緊設法輓運某路
人夫不齊火速差人催僱務俾師得宿飽又如彼有餘此
或不足則通融借支持至另補無致貽三軍枵腹之虞該

道毋忌勞怨有負委託未便

分布四面攻圍

爲軍務事照得八路大兵已入播州圍海龍國逆賊授首
應在目下但恐三省文武心志不齊號令不一或有相爭
相妒坐失事機甚至相害相戕甘爲敗類反使逆賊乘隙
逃走或衝突爲梗皆不可知彼時卽將漢土文武各官盡
裁以法亦曷益已爲此牌仰該鎮道官吏卽照後開分定方
位屯劄營寨約期來攻出奇應變任其所爲不從中制惟
是不許爽期會不許亂方所近鄰者必須應援同哨者無
分彼此事平之日除得賊者照格優異外餘哨卽不得並

以功論一體陞賞若或別生機械損人利己或包藏禍心
通賊取事或故縱賊逃亡他所或教誘賊攻害別哨事發
不論漢土官兵俱以軍法從事王法無私尙方可畏各宜
慎之

計開

四川綦江路南川路攻圍前門之西北

湖貴偏橋路平越路攻圍前門之東北

四川合江路永甯路攻圍後門之西南

貴州烏江路沙溪路攻圍後門之東南

以上圍前圍後如路窄者任其共出精兵合哨齊進如路

寬者任其各出大兵分道遞進但不許觀望逗遛及通賊泄機致有他虞違者定以尙方從事凡會期監軍道與總兵官俱畫押爲憑不得參差以四川鎮道爲首不得攙越致難遵守若別有緊要機宜大家商同卽徑行之不必拘於成案亦不必往返請命但不許夾雜私意致誤大事則自有軍法在

行總兵劉綎進兵

爲軍務事據同知史朝貞揭稱劉總兵自負謂擒賊事只須三日可了然必欲軍門一目擊之而後甘心焉據總兵劉綎亦稱賊已危困功在垂成伏望節鉞速賜降臨早建

蕩平之勦等因到部院據此爲照征播之費日可萬金一向老師費財令人心灰目斷今旣賊已危困蕩平之期只在三日該鎮卽宜一鼓平賊報捷轅門以收完局何故遷延不決必欲候本部院目擊而後爲快本部院就近調度自可急足相聞卽今章疏之奏報文移之催饋非營中可辦馬上可了勢不能卽至至亦不在三日之內何故舍其至易至簡而坐延時日乎恐傍起生疑謂該鎮力能平賊不肯早決通播留播之議紛紜而起非算也萬一停囚長智別有他虞三日之期何以爲驅馬之追乎合行責成爲此牌仰本官文到卽便作速決策及早滅賊今文到可三

日報來可三日平賊可三日總計十日之內專候捷音如再支吾遷延軍令具在

再催破國

爲軍務事照得三省六帥欽承明旨提八路之雄兵攻一國之小醜半月以來連催數次既不併力齊上而又無偏師直衝日延一日無動無靜總之借口滾木礮石之加略無批吭擣虛之策似此畏首畏尾之爲豈是多算多勝之道曠日持久老師費財若再姑息事無抵止相應立限期速成功爲此牌仰六監軍道官吏自今爲始督勵該路兵將日日設法攻打或運土石相度疊壘或伐竹木找搭雲

梯或合兵齊進或木路自取務要破固獻俘掃蕩巢穴如過初十日尙無成功不能入岡擒賊者該道卽將該鎮領兵中軍官鄉縛解來轅門以憑處斬總兵官聽叅蓋明旨森嚴非本部院所樂爲也該道監督兵務責任匪輕慎勿徇情庇護緘默不言未便

行各路報功級不得過一日

爲軍務事照得軍中斬級當日戰罷一查可知原無難事近日各路報功惟南川路每次首級皆當日報明其餘三路全屬含糊有先報捷功數日後方報首級數者有竟不報數直至紀功道文到方有數者有稱斬獲不計者如嚴

門之戰數日方報白石口之戰亦數日方報且前後兩報
數目不同今十八之戰止南川路報功三百綦合二路竟
無功級之數殊不可曉若非無功妄報必係搜索充數如
此用兵法紀何在合行嚴查爲此牌仰該道官吏卽行各
營以後功級當日卽報數目不許混稱斬級不計亦不許
延至十日半月方行補報及數目參差違者俱不准算仍
將各該將領兵官治以冒濫之罪

行各道查敘功次

爲軍務事照得官兵四合賊已上國環而攻之蕩平不日
真足以雪眾憤而伸國威所據各路從征漢土官兵節次

攻克過關隘擒斬過功級招降過人口雖經屢據塘報但查中間所報率多互異多寡不等有礙查敘係干題奏難以草草合就先行清查以免臨期遲誤爲此牌仰該道官吏卽便會同

紀功
監軍

道備查該路漢土官兵要見興師以來

何官何兵克過某關某寨若干擒斬拒敵惡苗爲首若干爲從若干俘獲男婦若干招降逆黨若干全活被虜人口若干與夫把截隘路護運糧餉防守城池但有功次可錄者俱要備細查據的確挨順月日先主將監軍督餉紀功各道次監紀管餉并監收監支督夫督運領兵偏裨大小等官以及部兵功次與隨營陰醫雜流等項照依舊規一

例鋪敘總造一冊仍另造簡明小冊一件聽齋再照文武各官武職有殫心奉公奮勇討賊者有故違軍令失誤軍機者文職有轉輸如期出納無弊者有饋運不前收支欠明者應敘應論必須每一路掇爲一冊分別功罪詳註考語限蕩平之日卽行星馳齋報以憑覆覈具題用昭勸懲旣不許遺漏參差又不許徇私冒濫一秉至公以彰盛舉其領兵等官或係實職或係名色毋分本省外省漢土等官俱要詳具衙門真正職銜以便查敘毋得依違混開致滋駁查往返耽延未便

柄牌催兵攻圍

爲軍務事照得逆賊楊應龍前爲山柙之虎尙肆跳梁今
乃釜中之魚何難烹煉八路官兵旣已連營合壘須要僇
力同心盡雪三薄萬姓之冤大伸戮將屠城之憤法在速
圖時不可緩合就督勵爲此牌仰某路官兵卽便遵照會
同七路兵將務要獎帥貔貅併力擣巢破國輯和行陣設
策擒惡獻俘盡祛秦越毋分爾我立俟捷音不復多贅如
再不相體諒過違三日不行捷報者卽拏中軍官與巾幘
之辱又至矣慎之慎之

再催各路攻圍

爲軍務事照得大兵八路環攻一國以眾加寡以順討逆

以我之有制克彼之垂亡誠能益奮忠勇鼓舞兵士或合
兵齊進一路或分道各取一隅或前行而後繼或左攻而
右援試探虎穴未必不得虎子者今乃互相延捱頓兵不
動蓋非持重之計實畏險阻之難不知國雖險而無兵可
恃酋固狡而窮蹙可圖不就及時剪除使之偷存喘息非
長策也本當行拏主將中軍官并遺巾幘之辱姑再督催
爲此牌仰該道鎮限文到即便移會七路官兵刻定日時或
合兵並進或分投攻打破國獻俘立收全捷將領陞賞軍
士犒勞必破格厚酬決不空言相誘如或再違日時彼此
不動法令之行自不能已

查奢兵私相兌糧

爲軍務事訪得永甯宣撫司土官奢世續遠住石寶擁兵自衛且日止縱今日兵與運夫私相兌支及搬運子女牛馬爲事若營中兵士既不給糧將何充腹又不督戰安望成功似此剝下自潤全無公家之急以致上下交怨威令不行徒擁虛名全無實用方今大兵四合逆賊上國環而攻之不足破矣所據該司之兵留之無益似應先撤以免糜費但未委虛實合就行查爲此牌仰該道官吏卽查宣撫司官不給糧不督陣擁兵虛冒私兌作奸等弊無則責令上緊攻圍擒賊速奏大功以膺上賞有則悉聽該道酌

量具詳先將此兵撤回以省煩費毋得違錯至緊至緊

行令水西絕私用命

爲軍務事照得水西土司及鎮雄土府兵馬近已累立戰功深入賊地忠順之心已明形影之疑盡釋不但黔省賴其兵力卽該司亦得享其勳名誠可嘉尙但今合兵圍圍功在垂成計須萬全合行申諭爲此牌仰該道官吏轉行該司府卽便嚴督部兵夾攻取事務全終始以保令名其部下羅兵苗兵或有爭功爭能與川湖貴各營官兵及別司土兵相鬩鬪者必以軍法裁斷無令以小忿妨壞大事其土漢目把人等或有與賊中相往來者亦必以軍法杜

絕無令以小利漏洩軍機卽賊子賊妻或以親故之誼希求護庇之私者亦必斬使焚書立絕私交以全大義勿爲所賣致損功名此皆目下緊要著數本部院切切籌慮不止爲地方亦爲該司也不然倘有弓蛇杯影之疑又有投杼按劍之事卽本部院確然相信外間曉曉之口安能家置一喙乎行百里者半九十該司必能達此矣須至牌者

催陳李二總兵入關

爲軍務事照得總兵

陳璘
李應祥

旬日以來連將青蛇碼碯黃

灘渡長坎等囤上中渡等關以次攻克擒斬甚夥本部院一喜功可嘉尙一喜會哨可期乃川中四路與沙溪烏江

二哨前則殺賊大敗今則圍困海龍若得該鎮提兵合擊
可以計日成擒胡爲半月竟不見來萬一停囚長智別有
他變咎將誰歸爲此牌仰該鎮官吏卽統三軍刻日馳赴
播州會同蜀中諸將奮勇抒忠堅心竭力務擣猥獩之穴
盡誅豺豕之羣亟早獻俘共收全捷如再延捱逗遛不進
致誤軍機者定拏領兵中軍官按以尙方從事該鎮衆究
不貸

行水西兵不得全占國後

爲軍務事據營中塘報報稱各路兵馬俱在國前水西兵
馬獨在國後等因到本部院爲照八路進兵水西兵馬不

過八路中之一耳。固左右無路可攻，獨前後有路。乃三省七路兵三十萬俱在前，而水西一路兵獨在後。是欲以一路而專七路之功，非事體也。且該土司目把人等多有與播人相往來者，恐招烏江之疑，更爲忠順之累。相應查處爲此牌仰守東道卽會同貴州鎮道行令水西鎮雄兵馬止照各路事體同貴州兵馬攻一路，不得全占。國後不許別路進攻，仍遠劄營攻時向前，罷攻時退劄，不得時常往來致取嫌疑以干軍令。

令降民復業

爲查復向化夷民以安生命事。照得播州五十四里與八

司夷民連年以來既遭叛賊虐害又值兵戈擾攘進退維谷聚散靡甯以致男不得耕女不得織妨廢農業數載於茲今照各路合兵圍固滅在旦夕播地既已蕩平惡苗悉行征剿所據歸順良民相應發同復業以全生命但前者領兵等官與塘報等役假以招降爲由乘機搶奪子女搜檢家財降民茹苦莫敢伸言卽今遣同歸農若非委用得人安靜行事萬一復有縱肆者參於其間藉口安插百端恐嚇索要財物此等窮民其何以堪合行併禁爲此牌仰該道官吏卽便會同監軍道選委廉能職官一員嚴禁不許多帶塘報人等督令單騎躬詣降民屯劄處所將該道

所轄松坎眞州仁懷桃紅龍泉白泥沙溪偏橋抵海龍岡
地方歸順良民逐戶清出悉心查審除逆賊原招眞苗不
許容留姑隹免死一一遞解回籍外凡係前項地方里分
夷民諭令各同原土安插照舊住坐趁時耕種不許拋荒
務要各安生理毋作非爲如有恃强霸占爭奪擾攘及仍
前通苗爲奸爲盜者定行誅勦不宥委官須要安靜行事
毋得帶領塘報多人致滋擾害事完論功敘錄各將安插
復業過夷民男婦姓名備造各冊一存本衙門一報本部
院收查俱毋違錯未便

行道鎮攻圍勿隹詐降

爲軍情事五月初八日據川東監軍道塘報四月二十九日丑時據合江監紀知府蔡宗憲稟稱酋遣鄉導劉庸刻話乞以田氏於二十九日早具表投降請諸文武僉謀乃可該本道於是日早會同總兵劉綎馬孔英并各將領監紀等官齊至國邊吳總兵營前比有田氏率其子遠隔圍下在三十六步俯伏跪投降表道鎮稟帖又訴狀一紙各等情轉報到部院看得逆酋屢次以妻子乞降計已數數茲伊母子若果真心畏誅自宜照賞格擒斬應龍投降軍前方可准信今乃聽其擁兵自衛空言支吾且恭迎天臺一語非賺人入彀繼之以兵乎如此舉動旣不破其奸謀

又不整兵相向反爲自限三日何其愚也至蔡知府稟帖內云真則受之以圖後舉是何主意豈尙欲緩兵養寇耶事在眉睫豈宜屢次失策合行切責爲此牌仰該鎮道今後再不必聽其空言詐降以緩時日惟獎率三軍照依分定前後門路一意進攻仍晝夜隄備以戒不虞左右設伏以防衝突漸入炎暑兵貴神速此本部院日夜拳拳跂望者若將領監紀等官不行上緊攻賊假借受降故延日時卽以通播重諭慎勿再延

再催攻圍

爲軍務事照得播賊上國兵不滿萬人人知之征播兵無

論三省卽四川三總兵所領已是實在精兵十四萬以十人擒一人亦可立盡乃自賊上國以來止是四月二十五日一攻軍令不嚴反致損失因而軍士心灰將領膽寒更不復言攻國事賊知其情使人約降明欲緩兵取事本部院先已有斬使焚書之文不知何故不遵反墮其計更立寬限以懈軍心在營文武如林無識者旣欲專功自利有識者亦皆袖手傍觀又縱容賊使往來盡得營中虛實逗遛遷延日復一日累累行文差人守催武職之跋扈者旣傲睨自尊文職之僂謫者又辯給自信不知各文武與賊何親與朝廷何讎而甘心墮九仞之功貽三省之患獨不

慮有尙方之劍。耶除近日縱賊失機。著有顯迹者。查明摘
叅。究治。外合再嚴催爲此。牌仰該道官吏文到。即便會同
各路歃血同盟。文職運謀。武職效力。各出精銳。更番攻取。
得賊之後。勿問出自何人。大家論功。若致僨事。逸賊或別
有失誤。軍機除所由自當重論。卽別哨亦不得言功。且當
連坐。各宜深思。毋致後悔。

營中禁約

總兵軍門今將營中禁約事宜開列於後

一千把總軍士有私領婦女出營寄住別處者。以臨陣在
逃處斬將官連坐

一軍兵有告假出關買牛殺賣希圖厚利致虛營伍者以臨陣在逃處斬將官連坐

一小委文官及千把總有索運夫銀錢方收米者分毫以上皆斬總運官不能覺察連坐

一軍兵有私收運夫銀錢折米者斬運夫同罪總運官不能覺察連坐

一攻圍之時軍士但取牛馬婦女財物者卽斬以徇將領縱容者連坐

委中軍官監督攻圍

爲軍務事照得本部院總督三藩文武合勦一賊動三億

萬之雄師費幾百萬之餽餉兵糧可謂雲集文武可謂風動正宜盡累朝之逋寇建千載之奇勳則功在旂常名垂竹帛矣胡爲入關已及四旬攻圍將及一月不次催督竟不能下豈果國之難破賊之難制蓋由官兵視爲泛常人心懈怠不肯用命故耳卽今若不申嚴尙方以示懲二戒百恐催案如山徒勞無益而曠日持久老師費財萬一別生他變將何結局爲此牌仰本官卽便馳去營中會同監軍各道并總鎮及領兵將領等官每日責令督陣官監押官兵照依坐定門路分投攻打前後夾攻必期刻日破圍擒斬元兇務要同心僇力不許妨害嫉妒成功之日一體

優敘如有畏怯不前觀望不進不肯用命者不拘中軍領兵將領等官許本官指名揭報以憑拏解轅門照例梟示決不輕饒仍一日一報以驗勤惰本官務要秉公執法以副委用如或徇情故縱一體連坐不貸

查水西通賊

爲軍務事據營中申報稱安兵自到後山日與逆賊通書來往萬一前以死報後以生遁官兵不能禁之我兵衝入國中罪人不得何以完報伏乞嚴行水西勿爲藏奸賊可蕩平等情到部院照得水西官兵素稱與賊有唇齒之交令人不能無疑乃近日卻餽儀擒賊使更又大戰敗之向

來心迹一旦了然且本部院竊計逆賊造反法在盡誅該
司與之來往甚屬無謂故愈不信胡爲今日兵臨國下復
有此說擬令行查爲此牌仰監軍畢節道卽查水西宣慰司官
兵旣已精白一心芳聲初著因何復又受賄通賊屯兵國
下往來不絕意欲何爲逐一查明追究下落若安疆臣原
無此事或係日兵違法交通亦要查究示懲一面擣巢獻
俘一面具由申報如或仍前逗遛交通及破圍之後不行
擒獻賊有逃遁者責有所歸該司卽百口恐亦難辯者

查賊詐死趨兵擣巢

爲軍務事據總兵吳廣稟稱五月初六日固上有人來報

酋於初五日亥時服毒而死令之送屍赴驗又云合國俱要具祭方行送出等情轉報到部爲照逆賊楊應龍詭詐多端變幻莫測蓋因四月末旬以來疊見斬其來使不惟詐降攻打愈急自知難支故作此狀將誰欺耶且酋旣死田氏母子與一國賊黨自宜隨卽將屍送驗自縛下國請死緣何藉口牽延以緩我師非假屍搪抵詐死誘敵之計乎大兵三十萬日費不止萬金自宜一鼓蕩平豈可招降卽今若延日不亟擣巢穴追捕元兇擒其妻子殲其黨類盡拔禍本恐逆賊詐死埋名潛林伏箚將征旗未返變亂隨生罔眾欺君之罪誰則任之况逆賊造反罪應誅絕原

無妻子投降保全爵土之說今兵臨國下逗遛不進御與

說降許之爵土明係受賄縱賊除叅論外合就督責爲此

牌仰該

道鎮

即便移文總兵吳廣及各營監紀并各鎮將領

文武等官毋分賊屍真僞獎率三軍上緊攻圍擒捕逆酋
仍將田氏母子大小兒女一家人等并脅從黨惡賊犯拒
敵者殺死生擒者縛出盡解軍前聽候俘獻務要一掃盡
絕寸草不留設或逆賊果死辨驗不僞事屬吳廣首報卽
取本官甘結各紙一報本部院一收在道鎮監紀各衙門
備查以後賊或復出或變亂生責在本官一面承認再勿
逗遛不前致墮賊計其本西土司不許縱賊奔逸已責成

該道約束如有違犯罪歸該道各將領毋得借口遷延致誤軍機未便

催解各路中軍官

爲軍務事近該本部院於本月初二日牌行各道鎮督兵攻打破圍獻俘如過初十日不能入圍擒賊者將各鎮領兵中軍官綁解轅門處斬總兵官聽叅去後今又逾期四日仍未克圍擒首乃各帥擁兵尸位一籌莫展日推一日結局何時所據各中軍官法難寬宥合行催解爲此牌仰該道官吏卽將主將中軍官文到卽便綁解轅門梟斬其總兵官俱令戴罪殺賊聽叅毋得延縱

行守東二監軍查逆賊身死攻圍擄巢

爲軍務事頃據總兵吳廣報稱逆賊楊應龍於本月初五日亥時服毒而死等情到部隨看得田氏所云明係假詐牽延以緩我師牌行監軍總鎮將領等官督率三軍上緊攻圍擒酋獻俘去後案查先該本部院密切有行一今日之舉要在必得罪人生擒爲上斬首次之若賊自縊必要有屍自焚必要有蹟若查無踪迹是賊逸也逸從何處放從何人罪必有歸若以假屍假紱捏充者以官員人等說謊論一賊之妻子及親黨頭目主謀人等係生擒者活解來以備獻俘係斬首者必要大眾驗視明白方准不得信

口捏報以亂真實違者罪之一賊滅之後各監軍總兵監紀官公同至固上驗視賊之財物家資金銀衣器各另封鎖造冊登記呈詳以便批發給賞若有寶物應進獻者公同封識冊報仍各撥兵委官看守不得縱兵恣掠致取嫌疑一各將領各約束部兵不許爭功爭財自相殺傷違者削領兵官之功仍以罪論等因通行鎮道遵照外爲照前項四款頗爲詳切乃酋因見官兵攻圍緊急自知滅在旦夕果作此態令人駭異但未審道鎮曾否相信合再申明詰問爲此牌仰該道官吏即便會同分守川東及川東川南監軍二道并四路監紀等官逐一詰查卽如所謂逆酋真

死要見身屍係何辯驗或據何爲憑設係詐死要見此賊見潛何處或所逸何方田氏母子大小兒女一家人等與脅從黨惡賊犯曾否盡數擒斬鄉紳獻出賊固有無攻克官兵曾否屯守家資器物曾否封記係何官兵守護以上事事必須逐件完明方爲全功少有一事不明不結或係僨帥在內通賊受財容令詐死埋名縱酋脫逸或主持招降全爵欺誑抗拒延緩我師致懈軍心別有他虞者一面督率三軍破圍擄巢一掃盡剿一面就將通賊奸人毋分文武據實叅呈應拏問者登時拏問應叅題者卽行叅題以爲罔眾欺君之戒決不輕饒此本部院與道鎮身任其

賁不得不深思長慮該道務要盡忠報國根究下落毋得徇情庇護未便

革吳廣職銜

爲軍務事照得鎮守四川總兵官吳廣原以本部院中軍官拔置大帥統領官兵征勦播酋受恩不爲不深承委不爲不重本官宜思主辱臣死之義堅滅此朝食之心身先士卒首縛元兇蕩平播土奠安西南方爲盡職方爲稱任乃自開刀以來招降頗多入關以後戰功亦著本部院未嘗不移文嘉獎望成功何期小器易盈微軀自愛自四月初八日經戰之後頓起偷生之心全無滅賊之志逆賊

知其心灰意懶因遂假意行成本官貪其香餌墮其深塹
遣使往來按兵不動致賊今日詐降明日詐死懈我軍心
增賊實備日復一日老師費財先是本部院聞其已中賊
計移檄申禁斬使焚書之文昭然具在本官視如故紙略
不遵行又知其專功自利大失人和特遣分守張按察使
赴營會同鎮道將領監紀等官歃血盟誓同心滅賊本官
高臥營中三請方至至則首稱楊應龍要限十日又稱事
不成我不過回家做指揮官此皆萬耳萬目共見共聞營
中塘報人人聞報者不知本官於賊何親於國何讎而傲
睨跋扈甘心縱賊查得本部院所奉敕書云云欽此今本

官所犯照屢旨宜從重處分先斬後奏照敕命宜先取死
罪招由戴罪殺賊今三省四總兵領兵二十餘萬卽去此
一人亦不爲少但臨敵易將兵家所忌向來征戰亦有微
勞姑且革去總兵職銜充爲事官戴罪殺賊爲此除行總
兵吳廣遵照外牌仰該道官吏卽便移文本官以後宜盡
改舊過力圖新功與各營總兵將領官合哨應援專力攻
圍與各路該道監軍并監紀官同心戮力一意滅賊若十日之
內克圍擒賊蕩平播土准復其官仍以功敘若仍前執拗
剛愎逗遛退縮或怨望生事更起別端尙方具在王法無
私須宜深思毋致後悔

查議運糧撤兵行守東二監軍道

爲軍務事照得逆賊造反興師弔伐卽今逼圍上國功在垂成但兵多道遠運糧恐不給應否將糧運至中途營兵來接或將多兵量分一半卽爲運糧之兵以代運夫之力或將冗兵漸次徑行撤散以省糧運三者孰爲可行合再查議爲此牌仰該道卽便密會總兵官酌議妥當應徑行者徑行應呈詳者呈詳其賊已平仍須重兵彈壓各總兵標下及應留之兵仍須每路萬餘以備搜山及計議善後事宜明白方行班師再爲遣發不可一時散盡俱毋違錯未便

再申飭殺賊

爲勦播等事案照近准兵部咨開楊酋謀叛詭詐多端其蓄養肖似其貌者不下數人倘勢迫力窮輒施狂惑之計少不加察首惡漏網而大兵撤回狡猾復出則地方之物力徒虛而天朝之威力難振是在道將親統大兵直逼賊穴首惡嚴加覈閱不可輕忽苟且賊之心腹爪牙不可輕縱致遺後患又賞格內開一應龍頭目人等若賞格懸示兩月之後既不能擒斬又不肯投降直至拒敵交兵爲賊盡力卽以謀反盡誅各等因俱經申諭去後爲照進兵以來已逾三月在逆賊勢窮詐死已不出本兵所料在賊黨

負固不悛又久違賞格明條目前之計惟有一意遵旨盡
勦此外再勿復有招降等說致懈軍心合再申飭爲此牌
仰該鎮道即便親統大兵直逼賊穴毋論晝夜分投攻打必
固破而後已必賊獲而後休又須嚴加覈閱不許輕忽苟
且至於楊氏親枝心腹爪牙頭目人等悉行勦絕一掃蕩
平務使種類不遺以免日後爲患自今申戒之後兵不進
賊不滅及更復有他議者不拘文武以通賊論一面拏究
一面叅題決不輕貸

再催攻圍

爲軍務事照得總兵吳廣剛悞畏縮縱賊遺患不稱任使

本應從重以軍法處分念用人之際姑革職充爲事官責令立功贖罪去後及照各路領兵官向來進兵各有路道今日攻固各有信地功罪自有賞罰彼此原不節制奈何數日以來以一人之喪心爲諸將之借口大家懈惰全不進取至於監軍道原爲監理軍務贊襄督撫本部院託重非輕奈何傍觀坐視旣無督併之文亦無叅呈之檄未效鷹鷂之逐奚取監督之司各贊理監紀官逐隊隨行緘口結舌坐視舟中之敵雅同局外之觀雖有如無溺職已甚通應叅究姑再督責爲此牌仰該道官吏文到卽便嚴督各路兵將查照分定信地剋期夾攻務得渠魁並殲餘黨

立奏蕩平方稱倚注其將領贊理等官有懷奸飾詐避事縱賊等弊不時揭報以憑重處如再疑畏寬假以致債事罪有所歸必不相貸

攻國條件

爲軍務事照得三省五總兵二三十裨將領兵二三十萬圍一孤國國上僅數千殘苗無計剿除坐延時日利令智昏者則信其詐降詐死爲真且駕言就中取事畏賊如虎者亦但以雨多糧少爲詞更不慮愈久愈難今賊養數千苗蠻尙知養之恩爲之效死朝廷以高爵厚祿養文武官員累世榮顯一旦用兵惟袖手傍觀只營利避害更無

三才圖會卷一
三
一點實心爲國可見朝廷養士尙不如應龍養苗真可媿
恨今巾幘之辱亦不能加於無志之人尙方之劍亦不能
遍於貪生之眾特此申諭尙冀猛省所有條件開示於後
各宜遵行須至牌者

一賊黨許降正賊不許降况賊自入關以來屢以詐降害
我官軍今後但有與楊應龍田氏楊朝棟約降者卽係逆
黨眾共勦之

一霧雨不可攻卽治攻具天晴無雨及雨小無霧卽合攻
失期者以黨逆論

一川兵水西兵圍國已久信地已定偏橋龍泉平越兵方

至當與各監軍會同議定信地不得用強混攙致有爭競
一各路監軍久不到營不知所司何事姑行帶管平越路
總兵已至監軍未至卽以該省監軍楊按察使代監之偏
橋路總兵已至監軍未至卽以四川監軍張參政代監之
監軍不得推託總兵不得違拗如本路監軍已至卽仍其
舊

一合江路先因該路兵多派之後右前左二處今湖貴兵
已至合江宜止一處不得仍占兩處

一凡分布約會務出公心會議事體以少就多有眾議的
見可行而一二人執拗不從卽係賊黨大家火速開報卽

以軍法從事

一凡約會剋期大家詢謀僉同其移文移單則以分守川東道張按察使爲首庶免推託

一兵多糧遠恐後難繼各營兵有陣亡者卽開除有病弱者卽汰去大率一路於原領兵數去三分之一亦不爲少多亦無用且難餉也

一各監軍卽各差人嚴催運餉不得專靠督餉官恐遠不及事

一今日之事西南半壁天下所係成事者卽係忠義爲國壞事者卽係奸邪誤國成事者豈必手刃逆酋但盡力攻

擊期會不爽卽是壞事者豈必助賊爲逆但專功妒功自私自利者皆是一向營中情態本部院分毫皆知異日當據實陳敘必不使巧僞者居先拙實者居後慎之慎之以上條件紛紜只爲大家不肯攻國遂費許多區處又恐事久變生諸路前功盡棄後禍更不可知若齊心齊力攻國國破功成豈不快哉惟願不付之空言云爾

行湖貴鎮道申飭秘示條款

爲軍務事案照先該本部院看得興師伐播賊計多端未破之前恐中逆酋奸謀奸計旣破之後恐我官兵爭功爭財於是約爲四款密示云一今日之舉要在必得罪人生

擒爲上斬首次之云云仍以罪論等因通行訖近有四川總兵吳廣不遵密約受其假詐延緩我師已經查駁叅究令其戴罪殺賊去後爲照前開四款頗亦詳切第未審各路文武等官曾否相信萬一如吳廣者誤事不小與其事發而罪之孰若禁之使勿犯也合再申飭爲此牌仰該道官吏卽便移行總鎮監紀等官一體遵照自今以後再勿聽其假詐惟一意進兵破圍搗巢不拘逆賊與田氏母子楊氏宗枝裔從黨惡一槩盡誅寸草不留仍以生擒爲上斬首次之以便嚴最至於賊獲之後道鎮與監紀官公同至圍驗視賊之家資寶物金銀衣器等件登記封識撥人

看守仍卽飛報本部院以憑分別進獻并批賞有功官兵以表功勞如有不遵紀律恃強攘奪爭功爭財者將領以下小兵以上聽道鎮登時綁赴令旗前梟首示眾決不輕饒若將領等官縱兵恣掠致有意外之虞者盡削前功仍以罪論不貸

禁取破國財物

爲軍務事照得官兵已將破國逆賊目下成擒所據賊之家資寶物金銀衣器等物前已牌行分守監軍各道公同監紀等官驗封看守聽候應解內府者解進應犒賞者聽本部院批賞去後但恐官兵破國之時各總兵官不肯鈐

東部兵致有爭功爭財互相戕殺致啟釁端合再嚴禁爲
此牌仰該鎮道官吏即便會同該鎮道并監紀等官如破圍之
時嚴加鈐束兵士首先必得罪人次則封識府庫既不許
恃強爭功又不許乘機爭財務要肅靜林立各守隊伍如
有誼譁嚷亂爭功爭財者不分官兵聽鎮道登時綁赴令
旗前斬首示眾其家資寶玩公同驗封明白飛報本部院
以憑分別進獻給賞施行如有隱漏藏匿及將官不行約
束縱容軍兵別起釁端者定將鄉賊大功盡削仍行重加
叅處不貸

查革蔡知府監紀

爲軍務事據合江監紀知府蔡宗憲稟稱田氏投表後初六日又據楊朝棟詐申楊應龍初五日亥時身死比職與吳總兵欲因謀行間朝棟母子初八日扶櫬出關候驗因與復入職請諸道鎮天晴驗之就中取事則朝棟母子及諸黨惡必授首過半隨卽急攻應龍可得乃諸文武人各一心必不待驗止欲明攻明攻非不正堂堂然不免費力居多或賊酋事急一時逸出及自投巖火且彼近獲有綦南兵衣甲倘混我兵而逸孰能識之此職等不必然之慮似未可盡以爲非今欲再問然不可復得矣案照近據本官稟稱田氏乞哀卽其來果真所重亦不在此婦但欲

借其黨就中取事可以少省工夫業限三日內回報可否
容圖之若酋計衝突逸遁勢必不能惟水西意不可測但
得與官兵合攻後路無少參商則成功在旦夕矣逆酋表
文漫無確語不敢呈上二十五日因酋乞降職與吳總兵
業斬差來楊永用拒絕矣今田氏果來姑容觀釁而動等
因又據總兵吳廣連報田氏母子出降及稱逆賊於初五
日夜服毒而死等情節經逆知詭詐駁行急攻去後今據
前因爲照逆賊若果懼誅真死田氏母子自是連夜送屍
軍前舉國下關投奔以求緩死猶畏其遲乃報死旣不送
驗據國又不納降其詐死抗拒昭然顯著乃知府蔡宗憲

總兵吳廣不知有何高見必欲驗屍招降果何爲也卽如所謂朝棟詐申欲因謀行間待其扶櫬出關欲就中取事明係支吾逃遁之詞旣係詐申賊又何肯母子扶櫬出關若母子扶櫬出關則賊已盡得何又云授首過半賊母子及黨惡旣已授首又何用急攻且連日天多淫雨幸一晴霽正可急攻乃必待天晴驗屍不知雨中獨不可驗屍乎賊恐攻之故每遇天晴便設一計今又自定天晴驗屍是又代賊設計也又云恐賊投之巖火今所恨賊不投巖火若投巖火有何不可又云衣甲相混逸出卽驗屍何保其不逸出句句矛盾無一中機之語蓋緣該營文武官以專

功之心中反間之計日爲賊用而不自知以致坐延半月
略無功效師老財費職此之由見事已敗露無可遮掩卻
東支西吾茫無定向又云今欲間之不可得是知其計無
復之而歸過於人此等存心尤爲可恨今討賊日費萬金
後此事且不可知豈爲營官說謊貪功之地本應叅究姑
從曲處爲此牌仰川南監軍道卽將知府蔡宗憲原管監
紀事務卽日革去責令統率馬湖官兵八千攻圍殺賊立
功贖罪如或不效定行併論從重叅處決不輕貸其監理
事務該道代之紀功事務轉行同知趙世德兼管毋得違
誤未便各具遵行緣由報查

獎總兵劉綎

爲軍務事據川東監軍道塘報總兵劉綎親自攻圍手放
大銃四架致火薰其面起一泡爲照本官素稱忠勇矢志
滅賊今手自發砲致傷其面殊足嘉獎又足憐念爲此牌
仰守東道卽便將懸賞銀用書封十兩簽書藥餌之資四
字親自送至本官營中以見本部院相勞之意仍令本官
以後益復親履行陣嚴督攻擊破賊之日定以元功論敘

催總兵陳璘攻圍

爲軍務事照得總兵官陳璘廣東芳聲未艾海外威名甚
殷茲者欽承明命征勦播酋首克三國猶如拉朽再破三

渡勢若燎毛逆賊因之喪膽一路遂爾蕩平本部院竊計
該鎮一至合兵夾攻固不足平矣胡爲旬日以來亦以招
降爲事不展一籌頓兵不動令人駭然不意該鎮素稱老
練智過孫吳熟諳韜鈴何所不解乃今一旦聽信債帥所
愚略無滅賊之心自干不忠之誚此本部院所不取者合
行督勵爲此牌仰該鎮限文到卽便會同各路監軍總鎮
及將領等官挑選精兵照依分定信地刻期並舉前後衝
擊左右夾攻務要破圍獻俘以靖逆醜如或仍前聽信吳
廣所愚再行招降延緩我師致誤軍機者不但盡棄前功
本部院定行從重叅究決不輕貸

詐降詐死全不攻擊致賊得以招降欺其下人防守益固
後知其詐又一味攻擊凡有投降者出亦不准信卽殺以
冒功以故國上之人自分必死大家抗拒以致兩敗俱傷
智勇俱困雖久之賊當消磨盡絕然我之勞費亦已甚矣
不知朝廷征播原爲討賊逆賊之罪止於一家况首惡不
宥脅從原免明旨昭然賞格具在卽今投降之人如王繼
先袁年羅國明羅國顯安鑾陳仕賢田良玉閻宗傳楊光
耀等或給之冠帶或給以優養本部院毫不爽信營中何
故貪功妄殺致干天和且將官原以滅賊爲功不以首級
多寡爲上下况殺降如楊惟中已經拏問又何必邀截降

人目報首級爲也合行曉諭爲此牌仰該道文到即便通行各營每軍前樹立招降大白旗一面責令鄉導降夷人等遍加傳諭多方招撫除逆酋并妻子田氏楊朝棟等一家必剿無赦外其餘左右一切軍師提調巡警目把苗夷親族人等俱許納降但係棄其衣甲器械隻身下國投降者不分男女審果不僞卽准免死給票執照發出安插不許驚阻及擅行妄殺違者抵死不饒其有能將逆賊楊應龍楊朝棟田氏或擒或斬真正身首來獻者定照格陞賞決不吝惜本部院以信制馭諸夷的不爽約慎勿疑畏各營仍一面攻圍一面招降不得以招降便廢攻圍亦不得

指攻國妄殺降人蓋卽兩軍對壘應敵者殺投戈者免自
不相妨各營仍須文武同心公平進取勿得如前私招私
攻中賊之計耽延時日自取罪累未便

查妄報功

爲軍務事據巡下南紀功道報據監紀知府蔡宗憲報稱
五月初十日辰時職隨道鎮親督四路官兵前後左右圍
攻賊囤鐵柱飛虎二關城樓城牆焚拆殆盡賊兵屢合屢
敗被銃打傷甚多止存飛龍朝天太平三關另行設法攻
打又稱副總參遊曹希彬等官兵已奪後路對面小山趕
至城門邊把住廣兵馬湖兵土城兵共斬級四十餘顆又

據該道報據都司吳從周報稱初十日奉令夾攻自旦至晚窮日血戰攻破頭關又進二關燒進城樓二座推倒城牆四十餘丈但日暮兵疲三關更險只得收兵其後路齊攻亦已奪山進逼關城之下各有斬級聽候類解各等因到部院據此查得初十日之戰塘報經本部院參互審質卽據營中往來差人及大小官役人等口報知是日總兵馬孔英率李經任承爵哈光顯萬民英等督陝毛西石平茶劉勝等兵與推官高折枝在關前總兵劉綎率周以德李爲瑚徐珊易朝臣莫如爵等官兵與同知史朝貞在前左總兵吳廣在左山與川東分守監軍及知府蔡宗憲在

上發吳從周兵浙兵在山下攻打關左城外山坡周國柱
羅星率陝兵駱有餘晏朝海漆太然兵同曹希彬吳文傑
杜熊兆等在後圍領大砲邊兵永甯兵廣兵及畢節道督
水西兵一併攻打圍後此是日分布之大略也前後左右
一時攻打四面受敵賊不能支如前關則石柱兵當前馬
總兵千總馬積冒傷先登鐵柱關正樓之側左水關樓則
劉總兵部兵先登賊大敗走卽拆牆燒樓一時俱潰此南
蔡二路血戰之勞若吳從周兵眾方進見彼賊下便卽圍
走以致左右不能獨立三進三退怒斬執旗督陣者何謂
也乃蔡宗憲與吳從周自不思忖混稱克破二關燒樓拆

牆誇誕裝飾何其大謬不然國後官兵奪取圓山直抵後門把守移劄圓山安立排柵功亦奇矣但非一路之力乃獨稱廣兵馬湖之兵有功又稱親督四路官兵前後左右圍攻賊國果能分身應之抑止在國前協同贊襄乎至若吳從周前門既無攻打之功後路與伊何預亦復混報此又厚顏無恥之甚者大抵該路文武別無創立謀猷惟以筆舌爲事觀其目前賊國未破之前屢屢攘功若此俟其既破之後爭功爭財必爲各路倡率合行查究爲此牌仰守東道官吏即便會同監軍二道秉公嚴查初十日之戰要見鐵柱左水二關與燒樓拆牆及國後奪取三山的係

何路何哨官兵攻克何路何哨官兵未攻或雖攻打退怯無功蔡宗憲會否前後左右俱到監督吳從周後路與伊無干因何亦行混報中間是何情弊又查各路止報克鐵柱關合江一路並報克飛虎關卽今飛虎關有無見在會否爲何人克破逐一查明回報以憑施行此後各路官兵或係同攻或係自攻俱聽該道與監軍二道據實開報毋得仍前虛捏混報查出取究未便

聞訃申飭

爲軍務事照得本部院稔逆賊之將亡憤諸將之不振方在秣馬脂車入營督戰忽於二十二日接得家報有先侍

郎府君之變蓋緣討賊無功債事殃民以致家門之禍延
蔓至此呼天搶地已死復生自念身爲人子辭親從仕醫
藥不親含殮不與有子若此不如無生卽欲刎頸穴胸從
先人於地下已而念夫不可死者有二親未葬不可以死
賊未滅不可以死然欲葬親必先滅賊不然用兵經歲老
師費財貽禍西南海內必尤其失策皇上必罰其不效自
分身無處所况能歸而葬親乎除卽日上疏請官交代仍
照往例丁憂候代官照常行事外擬合催督爲此牌仰該
鎮道官吏文到卽便獎率三軍克日攻圍一鼓擒賊早奏蕩
平庶本部院得借口復命式邁其歸是該鎮道不但有功於

國家有功於西南其爲錫福於本部院更無涯也本部院卽世世銜之甯止一敘勞酬功之典如其遷延如故結絕無期甚至通賊縱賊爲所不可爲以犯明法而干大戮本部院卽在候旨必且便宜行法墨綬登堂手尙方而親誅之決不令其僨事誤國且誤本部院使忠與孝兩無當也須至牌者

申飭輪攻日期

爲軍務事據川東監軍道稟稱云云案照先據總兵吳廣塘報云云又經申明去後行據川貴督兵監軍七道呈稱三省大兵齊集圍下今困賊月餘未覩寸功日復一日彼

此推延作何結局該七道公議圍前圍後分日分哨至期各領部下漢土官兵奮勇攻打務要同心併力庶可奏功除行各總兵官遵照外但事干軍機誠恐各鎮有專功懷利者仍前推諉不肯協力成功伏乞本部院嚴行申飭庶有責成計開五月十九日起至二十三日止共五日永合偏橋二哨三日水西二日俱攻圍後綦南貴州攻圍前以牽其勢如圍後成功各路幸甚萬一勢難卒克綦南平越二哨繼攻圍後三日二十四日起至二十六日止共三日綦南平越二哨攻圍後永合偏橋二哨攻圍前以牽其勢等因批行訖今據前因爲照吳廣前報會同分布本院以

本官係鎮守總兵必然秉公服眾詎意粗心大膽私已專功今前後分攻已近一月攻圍旣不能下講降賊又不降所謂不效之師正宜改絃易轍以遠嫌疑則六道之議以五路攻五日三路攻三日更番迭遣無非均勞逸品殷最期成功之速滅賊之早誠大公之論平心之處有何不可合行督責爲此牌仰該道卽便集思廣益開誠布公照依分定日期督率兵將前後輪攻不問五日三日效則通以功論不效併以罪罰設或不遵眾議卽不效其罪猶輕違眾議又不效卽本部院亦末如之何也已敕書森嚴尙方具在斷不敢上下雷同自貽伊戚具遵行緣由報查

破賊厭鎮法

爲軍務事據營中報賊凡遇我兵放銃卽令婦人脫去中衣向我兵以縋扇之礮不得中此厭鎮法也合行破解爲此票仰分守川東道卽便移文監軍二道知會以後遇此令軍中卽斬黑狗頭以血洒之法立破

策勵吳廣勿輒借口乏糧

爲軍務事據總兵吳廣稟稱李春先原招兵四百九十二名發守前門以糧食匱乏全營逃散及稱半月以來竟無升合到營等情爲照李春先被該鎮一百六十棍打死其兵無主自應逃散至於營中之米有餘不足原以相補該

營米向來有餘之時任從兵士開市貨賣略無撙節以致近日淫雨衝橋糧阻兵飢輒以逆賊衝出爲詞且自圍困以來一月之上何不攻取逐日講降直至師老財匱中賊之計又欲以兵餒爲詞縱賊衝出如此兵將爲賊而設耶爲地方而設耶爲此牌仰川南監軍道官吏卽便一面移文督餉道催運入營一面督兵上緊攻圍其營中瘡病衰弱不堪之兵一一點驗汰出勿令坐食虛耗糧米其各將領向來折乾耗糧之弊責令盡行改圖如有虛軍實糧空耗國儲及坐食講降不行攻取甚至假以無食嚇之鼓譟縱之逃散希圖罷兵留賊以遂其納賄賣國之奸者不論

是何文武必誅不貸

查妄報功

爲軍務事連日接得營中塘報任意鋪張無一實事無一實話如此扶同欺隱不知賊何日得平事何日得結如川南監軍道報稱五月十四日攻圍馬湖營報效生員張正印斬級一顆夫馬湖兵八千蔡知府督領半年以來費糧幾萬何無一人向前獨一報效生員斬級此生員奉何明文報效何處人氏何將官統領又據該道報初十日之戰所開頭領名字不下百餘又稱賊擁萬兵來敵夫賊圍上殘苗無多人人見之况是日前後來攻永合一路何遂有

萬餘迎敵我兵頭目百餘所領兵當不下數萬何安兵先
退官兵亦退彼退而我不退有何不可又報十七日分七
路行兵夫國後止一路如何分七路若路已填平何不七
路並進直破其城又據總兵陳璘報稱十三日夾擊海龍
國守備楊惟中奮勇向前斬級六顆夫陳總兵所領一路
兵三萬將數員皆何在而獨一貪生怕死之楊惟中龍泉
抱頭鼠竄攜妻以逃坑死萬人幸得脫死又日日殺降要
功長坎國下一日殺降人三百心尙不足今又來國上冒
功又稱斬級六顆不知是降人首級是病死入首級不然
是日廣兵與賊對坐並未交戰何處得級該鎮止欲爲之

安功脫罪獨不慮爲三省三十萬官軍所笑耶卽今師老
財匱運餉之苦家戶騷然大將日日擁兵坐食未見寸功
但催戰便稱無糧卻又日日說謊妄報文官抄謄故紙更
不經目不過爲之傳報而已不知自古以來有如此而能
成功滅賊者乎本部院讀之髮立眦裂不知各文武何以
安心何以消日將來何以自免合行嚴查爲此牌仰守東
道官吏文到卽將上項情節一一質對要見是何人作弊
何人說謊其生員張正印如係買功安級卽依律招解楊
惟中已行拏問陳總兵不許占愆不發致以敗軍之將買
級冒功沮我士氣以後大家要出良心存公道幹實事說

實話無令朝廷養士不如逆賊養苗又近日聞營中於各處找零人首級及病死糧夫軍兵之首亦爲所竊又有養降人以待殺者一遇攻圍便以報功觀永合路一向只約降相屍別營兵著一鉛彈打賊尙羣然鬪罵乃日日有報首級定是此類曹希彬等又每報陣亡輕重傷至數百人此皆邊上熟套老奸巨猾所爲不知此遂可以微幸脫罪乎一併先申明之俟再犯拏問

行畢節道退兵攻圍

爲軍務事據貴州畢節兵巡道稟稱受賄之說流布道路職不敢明指其有亦安敢遽保其無惟逆賊則原未逸也

連日拑攻彼兵死關我兵傷損甚多非逆賊孰驅之藉令
急而賄以逸誰敢任者克固有日賊能盡免俘降之口乎
諸目狡而多智斷不爲此禁讎爭禁搶擄自今日第一喫
緊務顧犬羊之性非盡可口舌化誨能必見利不動乎今
惟令退兵一舍嚴防奔逸而以國後讓兵剗營攻打總之
攻固功也守亦功也不惟釋多口之疑抑可杜競爭之漸
安氏自爲計與職等爲安氏計似無出此者等因到部院
除禁讎爭搶擄業已申飭外爲照賊自上國官兵四圍本釜
中之魚安能他遁乃今環攻月餘竟不能下果賊難破實
由我之人心向背不一不肯同心併力耳今勿論通賊受

賄有無情弊所當迴避卽屢攻不效亦當改絃易轍以責別將聽立新功安得曠日株守虛應老費據議退兵一舍嚴防奔逸而以漢兵剗攻深得伐謀妙算相應依擬合就通行爲此牌仰該道官吏卽便移會川湖貴州監軍等道行令水西兵馬暫退一舍嚴防奔逸聽前路三鎮官兵剗營攻打成功之日不問攻守一體論功併敘決不分別惟犄角相應共奏凱旋是所跂望者俱毋違誤未便

用計破國

爲軍務事據降民田良玉稟稱國前左邊水巷右邊婆婆巷又寶峰山左側各有小路一條共三處可以攀上前日

王等由此脫逃等情據此諮詢萬厯元年圍九絲城不下時有議者謂此山形勢似虎若擊其腰賊破遂緩中攻自九月初一日起令奢兵攻其頭郭成兵攻其尾連打八日七夜賊力甚疲盡將精銳者撤據兩頭懈怠中守次日重陽知蠻此夜飲酒必然睡熟三更時分令降夷么兒引平茶衝鋒兵五百攀緣附葛魚貫先登次石砭兵次吳鯨兵相繼而上斬其把隘數人舉礮一聲諸營吶喊並進城中亂竄登時蕩平此出其不意攻其無備之驗也今前後攻打不爲不急旣左水巷右婆婆巷與寶峰山左側各有小徑大都此國似與九絲彷彿頃良王等旣能依附而下則

我兵亦可以攀緣而上既九絲曾用夜半偷上成功則今日獨不可倣此計而襲取乎合行查議爲此牌仰該道官吏卽便會同監軍總鎮并監紀將領等官逐一密切計議以上三路既可下必能上如是可取則遴選能爬山越嶺飛簷走壁勇士數百束裝伺候前後連攻數日待其賊勢疲憊三路防守稍懈著令各兵三路攀緣而上團聚剗定拌死敵住舉礮爲號則賊膽盡寒前後解體諸路並進奮勇接應此國可破大功可奏矣如是畏怯不前不思計破日惟放銃吶喊老師費財將何抵止奈何奈何

行造益元散發營井中途安置

爲軍務事照得卽今盛暑之際營中軍兵攻圍途間運夫往來每以中暑生疾殊可憫惻合製益元散藥徧發爲此票仰重慶府官吏卽便動支官銀差人分投收買甘草三五百斤滑石二三千斤多撥醫生速合爲末製成益元散每營各發五六百斤以濟三軍解渴又自安穩驛起至圍下止或二三十里高阜處所堪以停歇飲水之處立一草舍安置瓦礪木桶畜水每處責令一人管藥料理以便運夫食飲解暑祛疾具支過銀數發過藥斤報查毋違

稽查餉米

爲軍務事照得四路兵馬逃亡旣多汰去亦眾則兵減夫

不減宜乎運糧有餘師獲宿飽胡乃愈稱不足喋喋馳報其故何哉若非領兵等官差人中途邀截折銷必係軍兵雜役私相兌賣而奸頑運夫借此息肩上下蒙蔽加之收餉委官日久因循不加整刷止憑吏書通同作弊私收兌帖報數了事竟置不問以致糧米到營者少大都坐此卽今若不立法稽考則餽餉有限需用無窮脫有不支將何接濟分守川東道原係總理糧運仍應專督爲此牌仰該道官吏卽便查照原行轉行管餉運餉官今後起解餉米運到營中卽具數報道該道驗過給與一票執照方許支餉官照票收納如無該道印票不准作數庶私折私兌之

弊或可少祛至於各路漢土軍兵中有病弱不堪及冗員
冗食法應陸續沙汰者卽會同監軍道計議撤去以免糜
費與夫逃亡事故各名下月糧卽日住支如有不行開除
捏稱並無逃亡及仍前折銷兌支等弊圖冒糧餉者毋分
官兵人等指名拏究應梟示者登時梟示應細打者卽行
細打愼勿輕貸先將汰過名數揭報

選鋒破固

爲軍務事照得圍國日久屢攻不下非人不眾蓋因兵無
選鋒耳茲欲選鋒必汰病弱省此之糧增彼之犒庶克有
濟合就查議爲此牌仰守東道官吏卽便會同東南二監

軍道將綦南永合四路漢土軍兵逐一挑選膽勇過人技藝精熟情願先登破圍衝鋒殺賊一可當十者每路數百名每人懸賞銀十兩脫有損傷外加十兩優恤毫不可少次者留營防守其餘病弱不堪者卽行汰去以免糜費齊心破敵在此一舉文到火速奉行再不得疑畏觀望老師債事未便具挑選過衝鋒汰撤過弱兵各名數飛報查考

申飭監紀職掌

爲軍務事照得監軍者監督將官運籌決勝有進無退之謂紀功者稽覈將官報驗功級有無應紀應削之謂至於監紀委官一則贊畫監軍一則劄勦紀功承委分任摘弊

發奸此監軍與委官之職掌也今乃有大不然者如監紀官此日將官本未與賊交鋒人所共知者不但不能催督臨陣且事後聽其所愚依違成風扶同報戰將誰欺乎又如一日雖與交戰原無功次亦人所共見者不但不能駁問功從何來復與鋪張捏報監紀謂何再如頃者營中官軍擄掠女子無限竟不一言逃亡軍士極多竟不一報將官冒功冒糧奸弊蝟集竟不一發且無功佐之爭功有過與之隱弊以若所爲非監紀乃將官之坐營也深可痛恨合再申嚴爲此牌仰守東道官吏卽便移文監軍二道申嚴監紀等官自今務要監督將領等官親率軍兵攻打賊

國每日有無與賊交戰或身先士卒或畏怯不前有功則報有功不得沈埋有過則報有過毋容妄冒如或仍前以無作有未攻作戰黨護爭功捏文混報欺天罔人與夫軍兵逃亡冒支糧餉一切奸弊再行蒙蔽坐視觀望不一實報者定行從重叅究不貸

行周國柱領兵守播

爲軍務事照得播賊雖云甫平地方已見大定近議於各總鎮標下共留兵三萬似覺過多無所事事相應專委偏將一員統領防守以省冗食及照管松潘副總兵事參將周國柱謀勇兼資堪以彈壓合行委用爲此除行二監軍

四兵道四總鎮每路止留本處兵三千共一萬二千餘兵
盡數撤回外牌仰本官即便統領前兵一萬二千專一在
播分布防守駕馭夷漢用資保障此後建置衙門修築城
垣等項事宜悉聽會同各道與委官計議而行毋得違錯
未便

委守東道綜理善後

爲集議善後事宜等事照得播賊已平法應改革已將建
置事宜節行該道并三省監軍兵備總鎮及監紀等官會
議去後連催未報蓋緣功成之後監軍有督兵之行兵備
有地方之責總鎮等官各圖自便孰肯任勞以致互相推

謾日延一日矧國破賊滅拓土千里用夏變夷貽範萬世
若非慎始安望保終及照分守川東道張按察使本以八
面之才可當三藩之寄况近日督兵八路流土懾服上下
歸依前項建置事宜自非該道綜理恐致築舍道傍相應
專委用臻實效爲此牌仰該道官吏卽將後開條款逐一
查議應經理者上緊多方經理應修舉者及時設法修舉
俱作速條開通詳以憑一面具題一面施行該道仍與原
在營贊理監紀各官不時往來綦播之間親歷處治勿憚
一勞以垂永利所謂萬代瞻仰在此一舉毋得違錯

計開

一留兵一萬二千要見有無足數足則內將一半留守白田壩以備工作一半分撥海龍金子等國或婁山巖門桑木等關每處三五百名相度衝僻緩急扼塞要害用資保障設有不足卽於萬縣羅網壩或於戎珙建武所召募補足務要不出萬餘之上查明回報

一綦江南川合江永甯四路運貯關內見存餉米各有若干共計若干扣算堪足萬餘之兵幾月之食何官收貯見在何處各縣衛及瀘州重慶見貯米若干應足各兵幾月之食如關內米食盡作何轉運其關內米仍速委官清查勿致遺失查明回報

一自綦入播除東溪安穩二驛夫馬供億屬綦答應勿論
外自松坎桐梓播川永安湘川五驛原係土驛今播州各
處旣改爲流則此五驛亦當改流其各驛應用夫馬供億
或將此中一帶田地丈量計算約種若干定爲一分召人
耕種免其征賦如川北軍站故事責令當差走遞如事體
穩便人情樂從則藉名取結在官以便承認期垂永久或
掣肘難行則作何徵派必須議定設處疏通以免阻滯查
明回報

一播地旣平一切田土俱應盡行沒官召人耕種稍待二
年後照例起科辦納糧差近聞有等無知愚民流移積棍

覬覦膏腴假稱原業徑行霸占夫朝廷動了多少兵馬費
了多少錢糧方有此土豈容混賴享成法當禁戢稔惡不
悛仍加治罪以警其餘查明回報至於奏民原係造孽起
事之人今播賊雖平然殺人命數十萬費錢糧數百萬皆
此輩釀成之禍今卽准其復業或原有貲產者方許告官
查明量給以見誅君弔民之意若原無產業及雖有產業
而不經告官輒自霸占者事發以亂民處斬

一咨之輿論酌之地利咸謂白田壩應設一府附郭一衛
一縣松坎地方三元壩應設一縣湄潭應設一縣黃平眞
州應改爲州以上設府衛設縣改州之制應屬地方里至

俱宜分明其各司長官原係印信相傳未曾附逆或首先
投順者應量授何項土職以存其宗祀至於白口壩建衙
門修城垣應用木石與一切建造事宜及丈量田土清理
疆界應用文職凡在事府佐等官悉聽委用把守隘口應
用武職隨便任使不必拘泥致滋牽延一面及時經理一
面條議通詳一應未盡事宜文內未經開載者俱聽開陳
於後及不時呈詳以便舉行毋致廢時失事

鑄銅鼎銘文發各土司

爲軍務事照得西南各省土司自國初開設以來恪守臣
節並無異志偶值逆賊楊應龍恣行反叛致速天誅敗家

亡身可爲永鑒今偃兵之日宜通行諸土司永爲鑒戒自
保爵土莫安西南爲此牌仰守東道官吏卽便轉行該府
將軍前給軍銅鍋盡數收來改鑄鼎器分爲三等將軍前
調用過川湖貴州雲南廣西宣慰宣撫長官各以上中下
製造給之其上銘文俱照後式鑄完之日呈請頒發先以
每等一件呈驗須至牌者

計開銘文

惟星拱北惟水朝東惟天王御極八方會同惟西南夷各
世其封惟敬天念祖庶以不墜厥宗順天者吉逆天者凶
以爲不信視楊應龍萬曆二十八年六月吉日欽差總督

川湖貴軍門右都御史李造

立銅標

爲軍務事票仰兵巡上川東道卽便轉行重慶府動支官銀收買銅斤責令匠作如法鑄造高一丈三尺者銅柱一根將後開銘文鑄入於上豎於海龍國之顛入石三尺上露一丈用鎮疆土以垂永久具動支過銀數鑄立過緣由報查

計開銘文

皇帝二十有八年播人告訏天王赫怒爰整六師以誅不供百十有四日盡俘羣醜遂藩其宮設吏治之方三千里

始入皇封載勒銅標永鎮西南臣李化龍

行高推官賑恤降民

爲軍務事照得播州招撫投降民夷雖經監紀等官安插然遭楊酋之亂室廬旣空衣食無措若不少加賑恤其何以遂安養生存之計查得涪州合江二處撤兵之後積賸餉米計數頗多相應酌量動支以示賑恤爲此除會按院及將烏江沙溪二路行貴州偏橋路行湖廣各撫院每路動米一萬石賑濟外牌仰本官卽將播州近日大征招撫投降民夷盡數查出大約以餉米一萬石爲率每戶給與三斗以示賑恤凡與涪州相近者造冊逐戶經送涪州管

餉官近蔡江江津合江者連人徑送合江管餉官各於積
貯各州縣解州餉米內照數動支給領事完將支用餉米
數目及賑恤過民夷姓名造冊通行呈詳以憑會題施行
查處獻俘銀兩

爲軍務事案照先該本院部牌行八路監軍總兵道鎮凡
賊滅之後務要約束部兵不許爭功爭財其賊之家資俱
要封識登記呈詳以便分別給賞奏報去後續據各道鎮
塘報國破之日賊之家財盡被亂兵搶掠無存及本院部
再三行查方報有奪獲銅鼓盔甲鞍轡刀劍槍弩等器續
又報有銀兩前來本院部初亦疑之近訪得所報銀兩原

非固上賊賊盡是各總兵扣除懸賞功賞銀兩湊合充數以掩縱兵搶掠之罪爲照地方蕩平大功已定賊之家財有則留之地方以充軍餉無則亦不失賊之家財盡行給與之旨若勉強造作以圖進獻無論軍士血戰懸賞功賞不可扣除而此等舉動亦不可爲訓也他日地方有事何以用人除銅鼓盔甲鞍轡刀劍槍弩等項應與播犯一同解進外爲此牌仰該道官吏卽查總兵劉綎吳廣所報各兵奪獲銀兩是否賊之真贓如是賊贓爲何先報掠盡後報此數如係虛報之數不必追求如係懸賞功賞等銀則原數不必開除仍應照舊還官作正支銷毋得違錯仍具

由通行呈報查考

發還吳總兵解獻銀兩

爲軍務事近據總兵吳廣開報破固所獲器械及稱內有銀盆二箇銀盃十箇共重一百兩等因到院部第未審此物是否果在固上搜得或係該鎮因見行查旋行造作者今進獻者止於器械各件獨將此物攬入其中似屬欠雅擬合行查爲此票仰巡上東道卽查該鎮所報前項盆盃一百兩是否在固所獲如係該鎮造作仍給還該鎮收領取領報查毋違

止陳總兵追獻銀物

爲軍務事據鎮守偏橋總兵官陳璘呈奉本院部憲牌遵將賊婦田氏何氏並諸葛鼓四面刀弩一百八十一件鉛關防一顆於八月初七日差把總徐學會等管解赴投又准左右監軍手本亦同前事連日會同拘集各營領兵把總哨官再三查審責令同營嚴加查搜得各兵在巢所得銀鍋銀盞等項共重一千九百二十三兩四錢三分除另差人管解前赴外合先呈報等因據此案照先該本院部牌行八路監軍總兵道鎮凡賊滅之後務要約束部兵不許爭功爭財其賊之家資俱要封識登記呈詳以便分別給賞奏報去後今據前因看得各鎮道原報圖破之日賊

之家財盡被亂兵搶掠無存及本院部再三行查始據該鎮止報起解前項賊婦銅鼓刀弩等項並未開有在巢搜得銀鍋銀盃等件迺今日久又突有搜獲賊賊之申竊意此物若果得之國上何不言於未追之前倏爾報於既追之後或係扣減軍糧功賞旋爲造作湊合充數以掩縱兵搶掠之罪亦不可知且未經該省撫院并監軍等道驗實轉報尤難准信爲照地方蕩平大功已定賊之家財有則留之地方以充軍餉無則亦不失賊之家財盡行給與之旨若強勉造作以圖進獻無論軍士血戰功賞不可扣除而此等舉動亦不可爲訓也他日地方有事何以用人爲

此牌仰該道鎮官吏卽將原報賊婦二口并銅鼓刀弩等器

上緊催督起解川貴俘犯已去旬日遲則追之不及恐致誤事其今次文內所報銀鍋銀盞等件未解則已若已起解卽行趕回仍查是否賊之贓仗如係賊贓爲何前起不言今次方報如非原物今當作何議處徑與該省監軍總兵會議妥當務要與人情事體兩無妨礙呈詳該省撫院徑自施行毋得違錯未便

發回陳總兵解獻銀器

爲軍務事據鎮守偏橋總兵陳璘呈差指揮趙繼勳等領解官兵在巢所得銀鍋銀盞等項銀器共重一千九百二

十三兩四錢三分到院部案照先據該鎮呈差把總徐學
曾等管解賊婦二口銅鼓四面鉛造關防一顆斬馬刀四
十二把倭刀一百零六把大弩三十三架及稱官兵在巢
奪獲銀器另行解報等因前來隨將賊婦羈候銅鼓賊仗
發仰四川按察司挑選堪用者俱報起解及看得播地蕩
平大功已定據報續獲銀器似係因見行查扣除懸賞功
賞銀兩勉強造作以圖進獻之意隨於九月二十六日牌
行該鎮井左右監軍二道備查該鎮所報銀鍋等件未解
則已若已起解卽行趕回仍查是否賊之贓仗如非原物
今當作何議處會議妥當與事體兩無妨礙呈詳該省撫

院徑自施行去後續據按察司呈報揀得該鎮前解器械止有銅鼓四面大弩二架堪以進獻隨差守備萬民英井該鎮差官徐學會同賊婦二口管解前去沿途追趕交與遊擊江萬仞領解赴京去訖及將其餘不堪賊仗發仰成都府收貯外今據前因看得前項銀鍋等器已行免解無容收貯合行發回爲此除將今解銀器共重一千九百二十三兩四錢三分照舊給與差官趙繼勳等領回外牌仰該鎮官吏即便查收照依原行牌內事理施行具收領過緣由報查

平播全書卷十一終